



Sud Bosne i Hercegovine
Суд Босне и Херцеговине

Broj: S1 3 Iž 040268 21 Iž
Sarajevo, 22.04.2021. godine

Sud Bosne i Hercegovine u Sarajevu, u apelacionom vijeću sastavljenom od sudija Srete Crnjaka kao predsjednika vijeća, Vesna Trifunović i Dinke Bešlagić Čovrk kao članova vijeća, odlučujući o žalbi Emsela Karića iz Sarajeva ul. Huremuša broj 20, izjavljenoj protiv rješenja Centralne izborne komisije Bosne i Hercegovine broj: 06-01-07-1-225/21 od 08.04.2021. godine o davanju saglasnosti na imenovanje članova Opštinske izborne komisije, dana 22.04.2021.godine, donio je

RJEŠENJE

Žalba se odbija.

Obrazloženje

Rješenjem Centralne izborne komisije BiH broj i datum navedeni u uvodu, data je saglasnost na odluku Opštinskog vijeća Stari Grad Sarajevo broj 02-45-184/21 od 25.03.2021. godine kojom su na dužnost u članstvu Opštinske izborne komisije Stari Grad Sarajevo imenovane članice Safija Šehović i Nevzeta Mulalić.

Protiv odluke Centralne izborne komisije BiH, blagovremeno je podnio žalbu Emsel Karić, zbog povrede Izbornog Zakona BiH ističući da je u javnom oglasu za imenovanje članova Opštinske izborne komisije Stari Grad Sarajevo navedeno da će sastav komisije u pravilu sadržavati ravnopravnu zastupljenost polova. Ukazuje da je raniji saziv komisije bio u skladu sa Zakonom o ravnopravnosti polova u BiH i da je mandat istekao jednom članu komisije koji je muškog pola i jednom članu komisije ženskog pola. Ožalbenom odlukom data je saglasnost na imenovanje dva člana izborne komisije ženskog pola. Prelaže da se rješenje o poništi i naloži nadležnom tijelu da izvrši ponovno imenovanje članova.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu, ukazujući da je donoseći ožalbeno rješenje njen zadatak da cijeni pravilnost provedene procedure pri imenovanju članova komisije i činjenicu da li imenovani članovi ispunjavaju propisane

opšte i posebne uslove, te da je o polonij zastupljenosti vođeno računa u odnosu na ukupni broj imenovanih članova.

Žalba nije osnovana.

Rješenjem Centralne izborne komisije broj 06-01-07-1-225/21 od 08.04.2021. godine data je saglasnost na odluku Opštinskog vijeća Stari Grad Sarajevo broj 02-45-184/21 od 25.03.2021. godine kojom su na dužnost u članstvu Opštinske izborne komisije Stari Grad Sarajevo imenovane članice Safija Šehović i Nevzeta Mulalić.

Iz stanja spisa proizlazi da je Centralna izborna komisija BiH utvrdila da je prilikom imenovanja člana OIK Stari Grad Sarajevo ispoštovana procedura za imenovanje člana OIK propisana u članu 7 stav a), b) i c) Upustva o utvrđivanju kvalifikacija, broja i imenovanja članova izborne komisije osnovne izborne jedinice u BiH i da je Opštinsko vijeće postupilo u skladu sa odredbom člana 7 stav 1 tačka d) kada je imenovalo Safiju Šehović i Nevzetu Mulalić prvo i drugorangirane na listi najuspješnijih kandidata koju je sačinila Komisija za izbor i imenovanja Opštinskog vijeća Stari Grad Sarajevo. Dalje je utvrđeno da imenovane članice ispunjavaju sve opšte i posebne uslove propisane Izbornim zakonom BiH i Upustvom, tako da bi nedavanjem saglasnosti na imenovanje istih, bila zanemarena u potpunosti odluka Opštinskog vijeća Stari grad Sarajevo kao nadležnog organa koji imenuje članove OIK. Time je Centralna izborna komisija BiH, pri donošenju ožalbene odluke, ispitala sve okolnosti relevantne za davanje saglasnosti u skladu sa članom 10 stav 2 Upustva i člana 2.12 stav 5 Izbornog zakona.

Davanjem saglasnosti na imenovanje dva člana ženskog pola u Opštinsku izbornu komisiju Stari Grad Sarajevo nije postupljeno protivno odredbi člana 2.14. stav 1 Izbornog zakona BiH (Sl. glasnik BiH 23/01 sa izmjenama) kako to žalba neosnovano ukazuje. Citirana odredba propisuje da sastav opštinske izborne komisije u pravilu odražava ravnopravnu zastupjenost spolova. Međutim ovaj paritet nije moguće primjeniti za svaku opštinsku komisiju, jer bi se time anulirali rezultati ocjenjivanja i dala prednost prema polu, a ne prema osvojenim bodovima. Stoga je ravnopravnu zastupljenost spolova ispravno cijeniti u odnosu na sve imenovane članove, kako je CiK BiH i postupio kod utvrđenja da od ukupno imenovanih 555 članova u izbornim komisijama 287 su muškog pola, a 268 ženskog pola.

Iz navedenih razloga Apelaciono vijeće nalazi da je pobijano rješenje Centralne izborne komisije Bosne i Hercegovine pravilno i zakonito, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine (Sl.glasnik BiH broj 19/02, 88/07 i 83/08) valjalo odbiti.

**PREDSJEDNIK VIJEĆA
SUDIJA
Sreto Crnjak**